

四庫全書

集部

欽定四庫全書

集部

堯峰文鈔卷

四十至
四十二

詳校官侍讀學士

臣法式善

助教臣常循覆勘

總校官進士臣朱鈐

校對官修撰臣吳錫齡

謄錄監生臣劉澹

欽定四庫全書

堯峰文鈔卷四十

翰林院編修汪琬撰

祭文 哀辭

附

共十一首

大通橋土地神祠祈晴文

維年月日具官汪琬以羊一豕一告於大通橋分司土地正神之靈曰嗚呼琬以不材奉

天子命而來以與神共治此地也生殺禍福之柄琬所不能主者惟神司之乃自夏五月霖雨至於六月河流

汜濫道路沮洳役夫消搖馬牛疲斃車戶二十有六人
煢煢奔走所日夜仰望者獨依於神而已神其忍見且
聞之邪意者雨暘之不時天實為之以神之位卑而職
微顧不及與知邪豈數不可輓雖如神之聰明正直亦
不能自達於天邪抑車戶之桀驁不率者實開梟於神
神將假手於雨潦以速之戾邪不然是皆琬之不勤不
慎或有以召致斯災而神且漠然弗之恤也琬竊以為
分司者苟有溺職神宜請之於天小則為疾為癘以創

懲之大則殄滅其身不當延及於二十有六人又不當阻

國家之輓輸而降害若此之甚且久也願自今而後邀惠於神慎勿以疾風暴雨加於行運之地使車戶得以蘓其困而緩其罰則其報謝於神者永永無窮而神之享之亦無忝矣謹告

祭季給事文

嗚呼惟公在廷歷官左掖俛視班行鷙百鷃一公規密

諫舉朝色惕公實丈夫羣鬚而幘事關宮闈仇仇端笏
雖涉風聞敢忘獻替仰櫻逆鱗慮有倉卒

先皇聖神止輦太息謂公愛君芻蕘宜擇且咈且俞儼
荅禹益欲老公才姑示薄謫膏雨疾霆莫非

帝德公之北征童叟嘖嘖扶攜祖送謹闐巷陌祝公生
還炷香叩額公去不顧忼慨于役臣臯萬死幸寬誅磔
甘履敝輻輪單轂隼寒日慘心陰飈淒骨魑魅與鄰叫
號充斥長沙卑溼潮陽瘴疫鱷魚張牙鵬鳥奮翮公禍

過之捐身沙磧懸棺橐殯有同棄擲嗚呼哀哉

世祖之末雲開霽滌乙夜寢興每眷忠赤使得少延必
蒙前席金魚緋紫行受寵錫如何絕命川馳苦激雖有
賜環於公何及聞公彌留涕洟交塞惟君與父睠睠牀
簀荒言寢語殷憂如昔撐目拒含齋恨寔穿藏血三歲
化丹為碧招魂而南僅歸背骸某等於公辱在交戚異
時瞻仰魁杓岱嶧寶公諫草寧啻拱壁庶幾公還載親
几席今則已矣山積星殒遠望銘旌道里遼隔白馬素

車奔馳弗獲羣馬搶呼聲發如若何以酹公酒絮雞炙
差勝湏酪公盍來格

祭葉訥菴文

嗚呼有明名臣夙推文莊碩德鴻材史所褒揚延二百
年遺澤浪浪爰及先生伯仲抗行魏科甲第後先焜煌
伯也蒞外宣力東方先生居內委佩巖廊咸謂二難永
紹前光云何並逝理不可詳訃音踵至親故倉皇憶昨
分袂春明一觴琬嗟老疾分守田桑旋晚先生志氣激

昂期先生者致主澤畔位不爰立年不杖鄉命也如何
殊失所望言別幾時音容渺茫向忝昏媾又廁門牆感
念平昔每九回腸本非至人曲折難忘喪之南歸君蒿
悽愴匍匐几筵淚沾盈眶既悼我私亦斯文傷嗚呼哀
哉琬故不敏才疏學荒先生知我指摘膏肓髮種種矣
敢絜短長擬謝子墨縮手山莊復陳蕪辭何不自量侑
此爵耳非曰成章先生有靈幸鑒中藏

祭陳母張太夫人文

母儀煌煌內則烈烈共姜伯姬聖經所述孰如淑人安
常履吉篤生儒臣用佐

王室嗚呼哀哉淑人之賢聲聞曩日內自君姑外訖親
暱歎息相範無不遵率謂與太翁偕老可必何行之婉
何境之逸顧促其年而不期耄天豈有靳奪之倉卒宜
修反促宜隆反替學士蒞官久參密勿瞻望二人迢遞
天末每念倚閭繼繼如結版輿錦軒將迎莫達屢欲陳
情棄此組紱淑人附書語極懇切勸以報稱俾無燕佚

無戀庭闈致曠厥秩慈訓諄諄形諸楮筆非此母也寧
具此識手澤儼然至今成帙陽月既望云發腫疾學士
旁皇額蹙心怵奔走日者以數推覈五行家言皆曰小
厄流星為灾穰之即出言而不驗可為嗚咽彼醫雖良
束手僥倖嗚呼哀哉如琬輩者才疏志拙受知學士毀
言弗恤噓枯植朽十年如一豈惟感恩實仰賢哲我儀
其清私餽必黜我服其慎溫樹必訥文章工拙學術得
失酒闌燈灺殷勤相質白首若此如膠沾漆誼於淑人

有同子姪愧未登堂以名通謁赴音亟來能不驚惶羈
旅京華舉步如屨何由匍匐往助執紼醴酒不清蔬肴
不潔悵然生悲淚沾要經竟無不之悽愴恍惚庶其來
乎千里一呷

祭仲弟楮九丈

昔喪先君孰相左右惟我與汝自立不苟雖屬童穉遞
相師友食則同案卧則聯肘每遇異書擊節拊缶有得
必告有疑必剖汝之文章詎出我後當其得意雲奔電

走溢為辭藻金彩襍揉儒林文苑罕與之耦弱冠慕道
已闕堂牖紛華靡麗棄猶芻狗志期用世時命非偶退
而著書旁搜薈數儻假之年擬附不朽天乎何辜反促
其壽太歲在壬我時北首自傷左謫感憤於口汝與我
言此非溫厚榮辱得喪於已何有我聞斯語其顏怵怵
虎嘯之旁春江晴濶方戒行李繫舟岸柳念汝送我涕
落尊卣及茲三年睽離已久我逐簿領面色老醜願挂
塵冠歸耕南畝巾車竹杖庶幾兩容此志未遂得毋汝

負訃音北來神驚不守膠邪非邪胡懼此咎汝雖已矣
我實抱疚歛不視含訣不執手何以為人袒胷自毆設
位於堂獻此酤酒魂無不之能酬此否

先府君祖奠文

琬聞過時不葬是不能葬春秋誅之與慢葬等顧琬成
人之後躬迫飢寒既壯以來又塵仕籍輒軻窳頓積有
歲年怙恃隆恩闕焉靡報以致我先考先妣淹在淺土
三周星紀乃啓櫬宮過時之誅奚辭解免茲直靈輅將

駕撫棺長號深惟臯愆飲痛曷已伏冀考妣有靈俛垂
昭鑒尚饗

亡妻袁宜人祖奠文

自汝之歸直予食貧衣麤茹糲累汝艱辛及汝病革予
方筮仕歿不及訣歛不及視追惟疇昔負汝實多汝而
有知齋恨如何茲從尊章幸就窀穸山川阻深足慰汝
鬼顧予早衰齒髮已凋九泉相見庶幾匪遙輒車啓行
敢告筵几同穴有期為汝破涕尚饗

亡男筠祖奠文

孝友誠信謂宜永年我作之孽致汝不夭我老未死汝壯而天家門嬛嬛已不可保嗚呼痛哉馬醫夏畦皆有後人跂行喙息孳乳成群而汝何辜竟絕遺毓有詩與書孰相似續當汝病革謀置汝後汝不復言屢搖其首惟汝隱衷我則知之汝今往矣諒我者誰人之不諒亦已焉哉天實喪予腸裂肝摧輒紼在門尊俎在几老懷萬千告汝止此嗚呼尚饗

先墓焚黃文

琬忝冒祿位積有歲時幸叨餘庥免於罪戾用獲荷茲
寵錫粗效顯揚伏奉順治十八年正月

登極制書

榮贈先考奉政大夫刑部山東清吏司郎中先妣宜人
璽書褒嘉光賁泉壤而琬以久縻官守弗克躬告幽冥
乃者既卜新阡敢襲昔賢燎黃之義祇薦墓下以展慕
思音容渺然詎勝哀感

鍾廣漢哀辭

并序

樵李鍾淵映廣漢年二十餘囊所著書數千言來遊京師介其友葉生元禮凡三至吾廬既相見數與予辨論六經諸史之原流詩歌古文辭之利病與自唐以來諸大家之門庭曲折口哆目張洋洋纚纚夜漏逾四十刻而猶不止予欲傲之以所不能知而廣漢性甚敏識甚高俛仰前古蓋其不知者無幾也使稍抑其盛氣而加深思焉則進於古人也不難顧別之旬日而元禮來告

廣漢已暴卒矣夫士死曰不祿短折亦曰不祿今廣漢
兼此二者其可哀也嗚呼豈造物者故畀之以才而又
不欲其成且立耶豈豐於此必嗇於彼固有默焉司其
進退予奪者邪豈亦聽人之自生自死自壽自夭於其
間雖造物不能有其權邪洵乎其可哀也已或謂廣漢
血不華色又其面豐上銳下以相法言之皆不壽此則
非予所得而測也姑為辭曰

文木雖美遇匠則斲植梨果蓏實盛則剝是而所是非

而所非氣壯且銳持此安歸故曰毋以物傷生毋以身殉名已乎廣漢其亦知之邪使其有知又將誰尤

族子處默哀辭

并序

處默諱譚舉人鄰幾公之孫也年二十餘以孝友聞於家以文章著於鄉黨不幸中寒疾死其族父琬在京師聞之哭焉而慟先是子為諸生處默嘗延致子執弟子禮甚謹處默家有園一區號為名勝其林鬱然而邃其池泓然而深子數偕處默履行其間相與撫喬木酌流

泉采襟華之紛翬翫鳴鳥之睨睨間以講道論藝談諧
甚適未嘗不移日忘返也未幾予客游松陵遂連取科
第而最後處默亦中副榜第一人是歲予適家居亟往
看處默處默因遂醉予以酒已復行至園中予乘醉戲
指示處默曰某徑可竹某所可亭可臺若盍亟成之異
日子與若皆退休當復晨夕游從於此言未竟處默視
予而笑且曰幸甚蓋予以遠大期處默者如此今其已
矣造化之生人也或美而秀或頑鈍而佻險此非天為

之也所謂物之不齊是也然秀者美者多夭折而頑者
鈍者佻且險者常壽考豈造化所欲殄滅者專在秀美
而其所欲長養培植者反在頑鈍佻險之屬與不然以
處默之才而遽至於死何也處默頽然長身為人勃發
有英氣及為文章亦然予求其所以夭折者卒不得焉
使天少假之年則處默之所成就豈復可量哉今顧不
幸若是予其能已於哀乎遂為之辭曰

質美分材良緬馳騁兮康莊何中道兮踈足齋遺憾兮

茫茫之子南兮羌北泝山川兮阻長視飯含兮不可遂
眇天末兮悲且傷愚者壽兮賢者殤命不猶兮將誰望
羌不知所歸咎兮姑致歎於彼蒼

陳氏子哀辭

并序

陳鳳翥字聖章子友均寧次子均寧方病及鳳翥生而
瘠故小名曰愈年二十夭蓋距上殤無幾也少不好舉
子業好唐宋以來大家之文又好為小詩旁攻書畫運
筆皆有法度予見其所寫牡丹芙蓉頗得前輩筆意詩

亦整秀可喜均寧哭之久而不衰乃刻遺藁一卷以行
又為淚言凡數十章附其後云昔虛谷方氏謂自周東
遷以入春秋卿大夫壽者鮮矣獨魯季孫行父季友子
也僖十六年季友卒至襄十五年行父始卒吳季札王
壽夢少子讓國時年可十五六至哀十一年救陳猶存
兩人壽皆近百歲鄭子產歷事簡定聲獻四公齊晏平
仲之父桓子襄十七年卒平仲即以知禮稱至定十年
始卒兩人亦亡慮八九十歲當春秋衰世卿大夫不得

其壽之時而四卿皆恭儉慈惠薄取厚予有以致壽考
其說甚新異然而非通論也孔子在春秋年僅七十有
三顏子淵早死夫孔子大聖卒不登上壽及門之賢者
莫如子淵顧蹈六極短折之禍豈孔顏不及此四卿邪
何壽夭相濶絕若此也蓋使有德與才而天不害其不
朽若愚無知之流雖年逾百歲與瓦礫木石頑然長存
者亦何以辨聖賢之所以壽者固在此而不在彼也然
則所謂才而夭如陳氏子亦其一已予既以此慰均寧

且系之以辭曰

吁嗟孺子性端良兮濡染家學藝能長兮譬彼威鳳燎
文章兮將翔將翔如其名兮雲逵非遙修摧傷兮鷹隼
高飛鳶鷂鳴兮休留姑獲恣披猖兮鳳也何辜中道戕
兮君母叫天天茫茫兮彼修此短靡厥常兮賴是遺墨
紛球琅兮襲之匱之騰輝芒兮爰載令問未渠央兮吁
嗟孺子斯不亡兮

堯峰文鈔卷四十

欽定四庫全書

堯峯文鈔卷四十一

翰林院編修汪琬撰

古體詩一

共六十
七首

擬唐人詩八首

陳正字子昂感遇

桃李無勁質松柏無芻姿炎暑屢代謝所遇各有時大
化既已然知巧安得施鸞鳩與鵬鳥高下徒相嗤惟應
達生者委運任所之

李翰林白飲酒

秋風吹片雲飛墮孫楚樓昔賢去已久遺恨留滄洲惟
餘樓前月影逐江水流江水自西來與月空悠悠若非
盈尊酒何以銷煩憂開軒設華茵四坐羅珍羞美女顏
如花為我彈空侯有酒但斟酌不待相勸酬醉弄落月
還嘯傲陵高秋

王右丞維飯僧

好道已多歲杜門滌塵衿風與山僧期瞻仰良以淡果

得躡飛錫來從祇樹林
梅檀結妙靄金磬流清音
供養先諸天分減被衆禽
暫假有為法一契無生心
從此厭身世抽簪誓相尋

崔員外顥游俠

珠勒珊瑚鞭翩翩搖綠駿
鬪雞咸陽西揆九平陵東
自矜身手捷隸籍建章宮
錦帶佩吳鉤銀鐫注雕弓
一朝事結束忼慨遠從戎
長驅沙漠垂心膽亦何雄
旌旗襍苦霧刁斗含淒風
前途失水草百戰終無功
雖有賢主

將弃之若飄蓬悔不居藍田射獵南山中

儲侍御光義禱興

麥畦雉方雊桑圃蠶欲眠但使衣食饒自足娛歲年比鄰有逸叟相見情依然稚子埽門巷孺人具盤餐時從農事暇竟日同流連熏風下長林纒陽滿平田兀然共一醉高卧北窓前

王龍驃昌齡塞上

黃榆生悲風落葉滿邊徼日暮望平原黯黯傷懷抱屢

對將軍簿不聞天子召功成其柰何痛哭蕭關道

孟襄陽浩然待友

裊回籬邊徑暝色清心目返照入流明孤煙澹寒綠前
墟出燈火隔岸歸樵牧之子不可期松牀酒空漉

韋左司應物寄舊

寂寥自多感悵望同心客微雨忽已過窮巷無來迹數
蜨媚蘭畦孤禽眷林石離居歲將徂紅藥為誰摘

精衛操

愚公既移山精衛亦填海所填能幾何矢志終不改口
穿羽折君莫嗤君不見海波亦有揚塵時

子夜歌二首

牀上鴛鴦衾案上蒲桃酒酒煖衾又溫何事不可有
停餐復停宿是儂憶歡時楚蠶初上箔何處不縣絲

子夜變歌

寄信郎不至郎情底太偏秋風擺荷葉能得幾時蓮

采蓮曲二首

月色涵清露荷花映白蘋一雙花下鳥妒殺蕩舟人
采蓮若邪谿谿流清更深但解照儂影不解照儂心

登鄧尉山

鄧侯栖隱處聞在西南峰昨投山僧宿迢遞尋遺蹤足
履一片雲手攀千尺松俛視太湖水孤光澹濛濛稍見
煙中邨微聞谷口鐘嵯嶇露白日洞門生雷風飛泉激
潺湲寒花弄蒙茸往事不可問昔賢何由逢但覺勝槩
殊彌令幽趣濃誓將遣塵慮長依采芝翁

咏古四首

鳳鳥翔寥廓，鸞鳩戀枋榆。所賦有大小，材器寧不殊。試
觀巢許流，褰裳避唐虞。袞冕尚不取，况使紆紫朱。萬鍾
等梯粟，百鎰亦錙銖。寄語銜鼠鴟，慎毋嚇鷄雛。

商君任督責，李相乃其倫。身族既湛滅，禍亦延嬴秦。驪
山土未乾，百二俱荆榛。空然阡陌諸儒首，難在編民始。知
長國家所，賢德與仁祖。龍蓋前車覆，轍寧當循。

武皇雅愛才，任使非一倫。張趙刀筆吏，卜倪耕牧人。偶

與時勢會遽登要路津駕馭雖有術揣摩豈無因遂令
淮陽守喟然傷積薪

朱家活李布名迹孰與儔能令關東士緩急皆見投鄙
哉樓君卿僅推脣舌優一承權門檄行路視交游執縛
故人子不待破柱按平生飾氣節所志但封侯攫名長
安市辟若雞狗媿以此廁游俠徒為鄉曲羞

謝沈編修贈藥歌

病夫移病一月餘翰林沈郎辱相念入門怪我顏色惡

知我坐久傷煩眩自言囊中有禁方頻年試此已經驗
許分成藥一贈我令我不覺加欣羨春來門巷苦寂寞無
人下馬垂顧盼因君訪我生感激況復深情重繾綣須
臾遽奉一罌至封題未開香味徧連朝服食果有益頓
使春風動顏面京城酪酥潤如蜜寶坻銀魚白於練貧
家治食雖不精此種亦得登盤饌往時遇之屢揮手即
今相對頗下咽願將暇力受方書悔向中年逐昏宦衰
賤已逢親友恤艱難終荷皇天眷明朝行藥到城南喜

與沈郎復相見

同王十一賦得江陂吟翠屏送陸巴州之任

君不見巴東山色連巴西江頭日落風淒淒行人過此
不能去停車愁聽江陂嘯巖壑千重斷行路藤梢葛刺
紛無數嘯陂弄此猶未了倏然騰上青楓樹使君行指
蠶叢祠巴人道迎歌竹枝歌聲將絕陂聲續清音嫋嫋
如哀玉錦官驛外襍鳴泉大劔山頭悲落木此日長安
一憶君知君遙宿閭城雲客中夜夜嘯陂起若到三聲

那可間

聞劉主事移疾將往蘇門賦贈

劉郎欲投劾去隱蘇門山區區青墨綬弃摘如等閒蘇
門自昔多幽趣曾是孫登長嘯處山色遙連盤谷雲竹
聲半落淇園雨秧苗參差槲葉齊居人何減武陵谿閑
門自有飛花入高枕常聞過鳥嘯劉郎乞身真不惡葛
巾布袍差足樂案上頻鈔內景經鑪中祇養長生藥女
能織帛男能耕門生扶舁相隨行丈夫適意且如此安

用悠悠世上名

題劉主事春水蕩舟圖

劉郎不向江南住底事便解滄洲趣
遠山歷歷水悠悠
髣髴三江最深處
儂家舊傍釣魚汀
芷萼含白蘆芽青
偶然蕩卻蘭橈出一曲吳歛最可聽
君今揮灑多幽致
令儂回首生歸思
樹影渾疑縹緲峰
鐘聲欲認楞伽寺
可憐三載滯長安
鄉寢依依逐夜闌
春來無限江南樂
祇向劉郎畫裏看

遙寄吳門友人題其墨妙軒

我從江南來君向江南去江邊好風日揮洒都成趣辛
夸滿鴈竹垂廊墨妙軒中倚隱囊雀硯曉涵清露潤鵞
池春漲綠波長知君卻埽還多暇獨自濡毫搦硬黃

送人還撫寧

鶯啼潭柘菴草長桑乾口此時送君行東風吹馬首關
路遙連沙磧斜知君今夜宿誰家薊州美酒灤州鱗好
醉棠梨千樹花

西湖歌送友

君不見西湖流水碧於玉
莎草如煙繞湖綠
西泠橋邊花正開
落花片片隨風來
木蘭艇子蜻蛉尾
擢入花間三十里
壚頭少婦調銀箏
嬌歌一曲最有情
當窻卷卻青綃幕
花香水氣傳歌聲
行人日午相倚聽
勸盡絲繩雙玉鉗
僊郎家近西湖住
暫假南行賦歸去
燕臺日落風淒淒
道旁相逢惜解攜
羨君南行向湖隄
向湖隄策馬蹏湖水平
湖草齊

王秀才欲從軍滇南詩以促之

君才如仲宣擬賦從軍篇銀鞍將錦韉結束毋遷延六
詔由來稱屬吏洱海蒼山等平地一從豺虎事橫行蠻
箐迢迢漢關閑番禺枸醬若為求益郡碧雞那可祀
至尊按劍臨丹墀爰分三道爭出師牙帳特開都護
府戈船直奪昆明池羨君舊擅封侯相遙逐征南志彌
壯錦衣玉具繡螭弧趨揖營門不相讓功名已解笑儒
生意氣何妨倭突將鐵柱南頭初合圍看君倚馬速於

飛好從楯鼻醉磨墨檄取蠻中驃信歸

老將行

漁陽老將老逾健手挽强弓彀長箭修顏垂白盡如虬
雙領下豐猶似燕自言少小學從戎躍馬能超六郡雄
戰血千行頻汚甲癍痕是處悉通中誰料數奇終得謗
平生意氣俱凋喪小吏翻為投筆人人奴卻擅封侯相
薊門烽火畫紛紛回憶雲臺舊建勲閒殺南山射虎手
醉歸羞說故將軍

過露筋祠

湖水渺無際古祠臨釣磯
蕩竿漸蕭颯楓葉森芳菲
一
二白髮巫衷回倚門扉陰
廊竄鼯鼠畫壁生伊威豈無
估客舟來酹椒漿稀靈兮秉
貞素獨處誰相依羞比青谿
姑願效黃陵姬山鬼雖陸梁
敢窺坐上幃我茲訪遺蹟
日落烟霏霏輕埃侵綠鬟寒
吹卷綃衣環佩了不聞徒然
想音徽

玉鉤斜

月觀淒涼罷歌舞三千豔質墮荒楚寶鈿羅帔半隨身
躡作吳公臺下土春江如故錦帆非露葉風條積漸稀蕭
娘行雨知何處惟見橫塘蛺蝶飛

游支硎山

白雲所宿處遠在牛頭峰我來振孤策獨躡磨巖蹤日
落烟景沈杳靄間疏鐘支公久淪化無人繼談宗石室
空峻嶒流泉尚淙淙去鶴不可招月明幽澗松欲訪紫
巖蹟莓苔今幾重

宿山寺

衆禽暝知還子亦山中宿是時雨初霽餘靄紛相屬了松上月清陰巖谷鐘聲入雲去冷然慰幽獨洵是諸天居能使心魂肅媿非宗雷傳幸躡東林躅

由董墓入聖恩寺

入竹不知路肩輿任所向風吹遠鐘來步步愜微尚芳樹紛葳蕤寒花屢飄颺翠禽哢疏籬松鼠越層障飛澗無停流夕嵐非一狀遺龕孤壑中香界諸天上漸覺清

塵心梵聲起高唱

夜坐梅花下聽潘爾開琴

月明銅井缺夜靜山蒼然回顧梅花林靄靄浮輕烟幽
人坐花下對月稍揮弦風吹弦上音俱向遙空傳蕭颯
澗底松潺湲崦西泉拊此未終曲驚禽噉不眠

奉慈菴尋雙松有趙文敏公題陵碧松三字石

刻

日斜訪陳蹟屣步游招提寂歷二古松蒼蒼與雲齊幾

逃雷火焚屢耐霜風淒玄鶴時一下翠禽或雙唳細皴
含凍苔橫鬣封春泥稍稍修枝出團團偃蓋低魏公去
已久短碣猶可稽樵客指殘石山僧拭舊題勝游足盤
桓墨妙難攀躋我亦支離者欲來結巢栖

與外弟金茲昭從子遵慧埜眺遂過楊彭山入
藏佛寺

南徐好風日相攜西郭西麥黃斑雉雒樹綠乳鳩嘯漸
入雲溪處芒屨屢延佇岡勢接平蕪江流帶孤嶼前林

曲更通邈迤問禪宮地繞藤蘿外鐘鳴煙靄中尋芳不
覺暮悵望回幽步月出水蒼蒼遙空一鶴度

予既蔬食停舟時輒拾埜菇為供頗甘其味慨
然賦詩

予本陋巷人飯蔬理亦宜秋露擷菰菜春風芣蓢絲山
居足嘉羞庶免肉食嗤自從越江游寢寐每憶之夜來
河上雨土膏發新滋呼僮挾長鋤散步行荒陂幸當葵
麥間得遇瓊瑤姿香若楚江芷色異商巖芝東臯與西

澗采掇寧厭疲歸來筐宮滿一朵我頗我感主父言
五鼎良可危不如楚中茹晚食能療飢遂樵道旁薪炊
之佐饘糜臨箸再三歎干祿今奚為

河水歌

河水在前淮水後水聲雨聲各爭吼打鼓發船船不行
篙工柁師俱束手泥沙滾滾逐波下雲霧沈沈駕風走
老夫去住安足論且炙河魚貰淮酒

李太白酒樓歌

任城酒樓高插天樓東桃樹非昔年騎鯨僊人不知處
狂客還歸四明路誰能醉卧燕姬壚惟見春風拂粵絮
我作東門游攜尊樓上頭可憐魯酒薄無復蘭陵翦借
問當時造酒者何如紀叟董糟邱堯祠遺蹟空荒荆遠
望徂徠何限情放歌一曲下樓去汶水東流日夕聲

官軍行

亂飛沙禽吠邨狗官軍夜踰穀城口大船小船爭避行
長年吞聲復揺手錦袍繡服月中明千鍾趙酒釀且清

胡琴搗徧伊涼曲盡是冰車鐵馬聲

抵王屯書所見

風吹東粵落麥穗猶未黃
雉角角鳴決起數尺強
我行愛此景下騎立旁
皇隔林幾人家茅舍周道旁
烟火陰疏籬雞豚散斜陽
最羨厖眉翁箕踞坐匡牀
瓦盆注濁醪襍以餅餌香
兒童競譁笑輓袂相扶將
既徵歲時豐亦見土俗良
薄暮且惴止無論道路長

戲堆雪為小山作歌示虞升

長安蚤春雪一尺紫陌泥深馬蹏沒驕陽不出浮雲陰
惟有飢烏噉最劇玉遮主人本愛山偶然堆雪臨柴闕
孤巒窈窕衆壑邃何異楞伽鄧尉間主人愛山兼愛客
相對不妨浮大白樺燭未跋酒未闌雪山玉山共欹仄
薛給事夜寢予死明日以告遂放筆作此歌

薛侯抵掌忽大笑昨宵妖寢難意料似聞狂客弃人間
帷堂髣髴羣相弔我本無才甘陸沈世人欲殺機太深
果然直此君勿訝流傳差快時賢心生亦不足多死亦

不足患朝菌未必輸靈椿此事由來如寢幻鼠肝蟲臂
俱莫論烏鳶螻蟻誰疏親平生每誚劉伶拙荷鉅元非
任達人

九日劉公勇招游草橋

右安門外斜陽縣駕鵞鴈驚紛平田草橋去天纔尺五
相邀竝騎揚修鞭輕雲隱隱橫白練遠山歷歷含蒼烟
道旁擔夫荷秋色漸覺景物東籬妍須臾下馬入幽徑
花開如綴黃金錢借問何人種花者葛巾儻類陶公賢

班荆襍坐陂陀側一一語笑皆入玄狂來便作鷓鴣舞
醉後亂撥鷓鴣弦吾儕握手豈易得况復簿領相拘牽
東南菰菜碧於玉雞頭漸稀菱角鮮分湖紫蟹已輸稻
夷亭黃雀方披繇故鄉風物殊可憐欲賦歸去無由緣
此身寧殊籠中鶴日夕引吭愁騰騫有花有酒且行樂
莫待綠鬢成華顛掀顛大笑杜陵空空將老健思明年

月食行

孟冬月食月末午官司樅金復伐鼓

聖人端拱乾清宮百僚奔騰都督府

左軍都督府雖廢月食必行禮

於此蓋延前明例也

即今寓內方昇平妖墓安得從橫行蟣蝨小

臣三歎息欲訴蒼穹何限情

憶宋牧仲黃州

齊安道上風土嘉修篁盧橘森槎牙使君簿領本無
幾日未停午先放衙徐呼官騎出江郭蹋徧離筍穿林花
青山隔岸歛晴霧赤磯映水蒸明霞竹雞亂鳴江路晚
乘興徑入魚蠻家我聞顓翁昔寓此曾借隙地開耕畬

荷鉏自種元修菜賦詩屢乞桃花茶有時月出江水碧
招攜佳客浮輕查可憐遺蹟眇難問流傳兩賦人猶誇
使君南行頗快意安用馮弔生咨嗟江山風月不易得
殊勝賈傅官長沙計期已見三寒食明年候汝趨京華

畫牛圖歌

桃花溪處何人家疏籬矮屋谿之涯谿水溶溶莎草暝
羣牛相尾嬉晴沙收雛負暄殊不惡不用高歌叩牛角
惟將一笛當風吹分明吹出農家樂老夫曾讀相牛經

一聞布穀思歸耕何時寫券租黃犢驅向東阡北陌行
分賦吳中古蹟二首送葉編修子吉還吳

放鶴亭

南峰寺前鶴已去猶有虬松卧煙雨幾時華表復歸來
飛向空亭作人語愛君心期如鶴閑知君不戀上林間
此行蚤謝乘軒寵長與孤雲共往還

真孃墓

瑤姬勝玉眇何許真孃又逐行雲去一生顏色能幾時

惟見蘼蕪襟荒土雲巖寺下花成邨采香胡蝶爭紛紛
畫船日夜競笙管不知誰酹真孃魂君今歸涉江南路
遙指真孃墓門樹武邱東去水如雲是向玉山草堂處

再送葉編修

江天搖落秋茫茫蘆花漸白荷葉黃駕鵝鴻鴈俱南翔
此時值君懷故鄉洞庭橘實甘如漿鱸魚撥刺三尺強
菰米絕勝紅粳香風味如此不可忘況有別業湖山旁

君家故墅在
鄧尉山下

埜梅萬樹松千章米堆玄墓連漁洋縣崖

絕壑森相望出游不須三月糧舉步便可窮青蒼褐衣
布韞山人裘收擎奇秀投巾箱底用劒佩朝明光月糜
太倉粟一囊翻然言歸策最良短駟徑逐西風張嗟予
仕宦經幾霜奔走簿領疲欲僵覩顏側足趨班行辟以
病蹇參騰驤亦欲掉頭理荷裳勸君開徑芟叢篁相隨
擬作求與羊一任流俗譏迂狂不夸不惠非吾長

前年行

前年彗星出軫翼今年妖孛互參畢秦涼饑饉江淮蝗

坐使

至尊常盱食

廟堂鼎鼎多名臣諸公哆口談經綸轉移造化自有術
區區禴禴何足云

送聖禪師二首

薊門楊柳衰蟬聒曉曉露吾師乘一葦遙指江南路中
食飽蔬筍獨往侵嵐霧氎巾與盃囊隨緣任所遇楓赤
吳江葉橘黃洞庭樹悵望雲水深孤蹤迴何處

遠公安禪地嘗在雪竇山山石何嵯峨孤雲宿其間雨
淩滿空谷泉聲日潺湲偶乘逸興出興盡遂言還獨攜
柳栗杖矯首離塵寰昔時手栽松蒼蘚今斑斑試觀石
上月依然照松關

贈文與也三首

與也方為
予作畫

窮達固有命深悔讀書晚何當如脉望終歲穴故簡文
郎好少年落筆乃澹遠置予湖石間書帶綠於蘚

君家西山下種竹滿竿臨平生一枝筇借作芒屨助

中富邱壑點滌託毫素予本玉遮樵對之起遐慕

昔有待詔翁藝林推大雅槃礴玉蘭堂

待詔堂名

名在唐祝

亞諸孫今繼起亦復善揮寫旅食長安道歎息無知者

送葉元禮之儀真

遲陽照芳渚忠風披翠苔偕子帝城隅屣步恒消搖懽
悰未渠央理篋赴嘉招主人方愛才敢憚道路遙於時
桃始華綠波漲回潮去颿速歸燕千里陵輕颿矯首望
北固感懷言南朝觴咏諒難俱所期遺瓊瑤

送武林張彥若歸梅花草堂

鶴鳴幽澗空孤山迴蒼蒼詩翁一去眇難問風流猶配
水僊王山中埜梅翁手植至今老榦陵風霜君家卜築
山之陽曾開花徑穿松篁年來旅食不稱意曰歸高卧
梅花旁落花點破莓苔色殊勝東華紅土香

有客言黃魚事紀之

三吳五月炎蒸初棟樹著雨花扶疏

吳諺云棟樹花開黃魚來故云此

時黃魚最稱美風味絕勝長橋鱸憶昔東南全盛餘海

舶銜尾張網。眾公然滿載返吳市。市中雜選謹擔夫。柳
條貫腮冰貯腹。數尾僅直千青蚨。豪門膳宰善烹治。劑
以醯醬芼筍蔬。芳鮮頓覺溢几案。主賓下箸爭歡噉。須
臾飽食共摩腹。餘羹猶飫長須奴。自從洲島阻兵燹。鯨
鯢竄逸稽天誅。

詔書尺一禁杭海。漁師安敢颿揚蒲。蛤蜊海母尚難致。
況望此魚供客需。黃金為鱗白玉質。中裹膏液尤推腴。
老饕雖患食指動。畏觸禁令生佗虞。吳儂日夕歎且吁。

有司束溼嚴錙銖何當小醜就拘執舳艫往返如通衢
舶趁風中販鱸至此魚復得登庖厨吾儕口腹詎足校
但願海晏波濤除

廟堂日埃羽書捷戈船諸將今何如

送楊職方便安南

日南古象郡分據逾百年後先款漢塞貢篚來綿綿兩
姓皆

王臣勢若脣齒連如何逞私忿螳鬪方紛然蒼茫浪灩

間銅鼓鳴宣闕都統秉

王章束身自歸滇羽書聞

天子未忍加誅焉念此椎結氓何辜罹劉虔妙簡輜軒
使俾以文告先其有不率命

天討寧舍旃楊子起江左才華擅蘭荃數載職方郎運
籌佐中權昨持使者節

廷宴敕加籩大官執奔走羅列皆肥鱸錦袍繡麒麟五
采相鉤聯萬釘白玉鞞巧匠之所鑄云出

尚方賜寵渥寧為偏龍函奉

璽書去指西南天太守負鞬矢蠻獠拜車前抵掌解紛
爭尊俎勝戈鋌豈羨伏波翁建柱羸城邊我聞日南地
險遠難攀緣絕壁唬鉤輶溪秋曳死延烟嵐晝昏翳有
時墮飛鳶解后中蠱蠶十人無一痊黃茅與叢箐行旅
多回遘道路非不艱

王程敢遷延驅車叱其馭意氣殊騰騫計日奠南服壯
遊良足傳故交悉冠蓋折柳登祖筵共軫離別情歸驂

蚤宜鞭

灌園歌

贈李秀才良年秀

李郎家無卓錫地規作菜過非左計即拋儒服荷長鉏
去逐園丁謀種藝黃花紫萼交加開繞籬蛺蝶爭裴回
日斜剛抱谿頭瓮恰直前山暮雨來數畝方畦差自給
底用攜筐拾榛栗門來學煮東坡羹蘆菹蔓菁皆可喫
西鄰種禾苦未收催租縣吏紛誅求李郎獨飽園蔬味
夏稅秋糧百不憂

贈王山史兼寄題獨鶴亭二首

嵯峨樹石營邱筆
蘭亭定武刻

山史攜所收書畫甚多營邱畫人物

樹石一軸五字不損本蘭亭一卷尤可寶也

秦川公子收藏家
牙玉為籤錦

為帙蹇驢馱來入京國
好事何人相賞識
几靚窓明親

卷舒每防寒具沾遺墨
我聞君家築亭太華偏

亭面華山

短

歌招鶴鶴來前松陰月午引修吭
何不騎此同飛騫看

君直上西峰顛
俛視長物皆可捐
區區書畫何足道一

笑過眼如雲烟

我不羨輞川鴈中辛
夸白亦不羨灞陵橋頭柳
條碧惟羨君家一草亭
遙對青柯坪上松
千尺玄衣老鶴何處來
瘳骨稜稜露標格
有時叫月長松間
松聲鶴聲並蕭瑟
老夫愛吟招隱詩
佗年峰頂結茅茨
從君擬乞浮邱術
也借僊人一隻騎

馬蘭曲四首 并序

予出都門往往見道中
莖草叢生其花方觔
詢諸土人曰此馬蘭也
因倚唐人蘭蘭是
小草五字續成馬蘭曲

云

蘭蘭是小草紛紛花滿路本無桃李顏不怕春風妒
蘭蘭是小草行人稀采摘為郎藉馬蹏道遠亦不惜
蘭蘭是小草離離如有情安得西北風吹花逐郎行
蘭蘭是小草託根道旁久明年花又生郎定歸來否

堯峯文鈔卷四十一

欽定四庫全書

堯峰文鈔卷四十二

翰林院編修汪琬撰

古體詩二

共七十
五首

清涼寺中與武曾訪景陽宮井因飲海棠花下

春山如畫屏羣芳亂烟霞小紅歌曲徑點綴山僧家我
來訪陳宮樹石空槎牙髣髴辱井存綠蕪翳深窪山僧
施法雨欲洗胭脂汙妖艷銷未盡千載萌根芽至今光
風中一一開晴葩嫣然展微笑絕似宮中娃試問諸天

女豈解散此花正恐花信闌淒涼委泥沙與君置尊酒
及此風日嘉無然感廢興三歎張麗華

還家檢校草堂及書屋訖作此

門前流水屋角山先生一笑開
繹顏平生苦無立錫地
何意有此茅三間修穎老松卧
苔石苔花濫濫黃金色
竹籬蓬徑頗宜人好岸一巾扶
兩屐先生倦遊今幾年
歲暮日斜殊可憐但辦鑪熏與
茗盃濡毫真箇賦歸田
至清江浦貽上晨過舟中與之小飲

挂颿斗堊亭落颿淮南邨感君遠相顧
擢枯楂根是時漲初減綠波半篙渾涼吹滿絺衣入水生縠紋攜君坐船頭喜有濁酒溫景物況爾佳烟柳搖初暎試鱸水精鱗堆雪隨風翻君雖不解飲為我盡此尊我儕本不羈所志非高軒微官偶為累坐困簿領煩幸然脫塵鞅如鳥辭籠樊千里得良晤一笑眉宇掀借問平生交零落今誰存東西與南北遊川日沄沄俛視諸兒曹瑣細何足論會堂吐壯氣一往虹霓奔岸巾抵兩掌不顧四

坐聞君盡怨我門母令遽聲吞明發復行邁相望青綺門

黃河

河流挾風雨勢欲穿城堞平田多陸沈不逢邨女饁居人憂水患夜卧孰敢帖往來南北舍塗泥每遭蹶如何漁蠻子獨與河伯狎舉家傍蘆葦取給舟一葉生兒雖長成不綉亦不縻委身餘淖中頗類豬與鴨我來三歎息安得防河英但聽謹呼聲家家持畚挿

河水暴漲舟不能前謀舍舟從陸行

昨從江上來據舷但穩坐檣竿挾輕風闌忽巨浪破長
年百無事倦倚柁樓卧山色入船窓快意亦覺頗誰知
達黃流遽受河伯挫駕驪鞭風霆秋漲能許大想見欣
然喜一往恣掀簸役夫輓弱纜憊甚沉沒髀何如遵往
陸免飢蛟龍餓三占從二人況有羣言和簡書絕可畏
王程敢辭瘴明發我將行鳴鐸驅騾馱

翼日渡河過駱馬湖

孤舟如昨日兀坐發長喟忽聞疊鼓轟此事頗意外
擣頭旗腳轉悠然出滂湃河神似哀我不復邀祈賽官事
有程期驅使速北邁落日漾輕颿歌仄了不礙竟得達
安流韋荷蛟鼉貸平湖眇千頃淥淨別有派游龍襍菰
蒲遠近略相帶好山落其中明鏡點蛾黛我生否已極
乘除理宜泰回顧風埃稀倦眼聊一快

駱馬湖

湖流淥淨殊不惡檣竿又轉風颿腳世間快意真有此

何異罾纒復騎鶴漁家小艇穿綠蘋網得銀刀三尺鱗
今宵買魚佐邨酒一醉船頭歌角巾

與武曾翫月因取東坡句賦此歌

東坡句新月如佳人人從

來佳茗
似佳人

有月如佳人娟娟眉嫵長有茗如佳人澹澹肌理香與
君歡茗佳對月深秋風味兩奇絕君不見筵前檠燭搖
簾櫳鳳槽龍撥彈春風蒲陶之酒馬腦鍾遺簪墜珥紛
無數我非其人終不顧拂衣出門酒未闌兒曹大笑儒

生酸

夏鎮舟中作

垂楊蔭落日，蕩華弄輕風。能言綠頭鴨，浮沒滄波中。漁
邨與蟹舍，微有一徑通。舟行直此景，倦眼開雙瞳。我家
蘇臺下，幽勝將無同。平湖眇數頃，炯若磨青銅。倒影浸
山角，長作眉黛濃。雨餘暑氣薄，水雲澹濛濛。試呼黃蔑
舫，往穿蒲葦叢。橫塘采蓮女，沿流每相逢。吳歛一啓齒，
嫋嫋摩晴空。歸來夕陽沒，新魄縣半弓。自從涉江淮，鄉

寢隨飛鴻狂飈驅濁浪四顧嗟途窮今來湖隄上稍滌
塵埃容少住為佳耳無然漾孤篷

南池即子美題詩處

華奴才了山香曲玉奴又撥檀槽續後宮競習清平詞
未必細紬三賦讀曾來此地停征輪蒲荒蕩熟波粼粼
藏卻平生掣鯨手偶然默筆還驚人漫道文章特小技
沈宋見之應奪氣至今池上行人行猶為一詩停去騎

雪

泗州道上雪車輪欲敗馬蹏蹏行人回策投空林飢烏
亂嘯烟火絕爪洲道上雪日暮孤舟理輕楫行人遙指
金焦峰數點魚鰲望中滅北風未息泥未融老夫三歎
憂途窮何如今日穩坐茅堂中一任撒鹽飛絮穿簾櫳
瓮頭新筍美且濃掀顙一舉尊壘空衰顏亦得回春風
游靈巖禰咏五首

吳王井

金秋既已殘碧闌復已無宮中井猶爾況此井上梧寒

泉咽不流千年鑑亡吳傳聞景陽宮亦被胭脂汗

硯池

誰鑿三尺泉涓涓古臺側無人擘彩箋石筍空如筆為
染墨痕多餘流黝然黑

響屧廊

吳王敞畫棟曾貯越谿女想見笙歌中蹋筵舞白紵履
綦竟安在遺趾空煙雨隱隱芒屨聲樵翁自來去

翫花池

吳娃昔愛華繞岸華如靨共蕩木蘭橈香風吹繡袷誰
知桃李盡蒲葦汎鳬鴨時有山僧來引泉澆菜甲

西施

竹葦異柔韌河濟殊清渾貞淫各有性孰能究其根越
女既妖冶宵顧吳宮恩單舸逐鷗夸此事奚足言不見
千載後猶然魅王軒

雨中禱興六首

是時將入山
訪儲公不果

屋角婦鳩嗁林端姑惡語天公不好事薄寒釀陰雨已

宿名山諾泥滑奈何許吾其為卧遊往挾睡鄉侶

樹石堯山陽茶筍娃宮下卜居西郭西相距纔一舍日
者賦愁霖有車不遑駕何時數往來遂結東林下

吾窮豈坐詩蓋為骨相寒仕宦車耳生味少興亦闌絮
帽與布裘浩歌自盤桓俗客幸不至勿刈當門蘭

體中頗不佳愛檢巾箱藥平世幾兩屐高卧久未著況
逢積雨多餘潦壞籬落翳翳李梅陰惟聞鳥聲樂

牀頭數卷書屋脚一弓地未衰得蚤閒行坐頗快意尚

受宿業驅斯文恣游戲辟之蟲蝕木非鳴不平事
肉食溷乃公恐非山澤宜薑梅點蒸壺鹽豉下蓴絲山
庖足俊味一飽良可期腹吾不負汝勿羨豚膾

寄武曾貴州兼示沈周諸君四首

吾友班揚徒聲名走畿甸幕府方急才去逐黔陽傳
恩書檄間楯鼻磨作硯華國有若人惜哉莫能薦

翩翩朱公子折節治古文與世絕少可每言喜御君相
攜從我游鶴立於雞羣豈無東南美瑣瑣不足云

往時灌園圖烟墨濡吳綾作者果誰氏翰林有雲仍

與文

也作比聞杞菊荒菰芥獨青青何不歸去來偕婦師於

陵

自我歸東南造門無此士平生六藝學聽者塞其耳詞
賦頗類俳章句極可比天未喪斯文勉旃二三子

五十生辰放歌

有耳何必洗塵埃不到先生耳有齒何必礪利名不挂
先生齒先生比來更事多宜愛軒冕嫌烟蘿前春屏居

吳市側去秋誓墓吳山阿相羊雖豚郢闌入東西舍籃
輿但要諸生扶藤杖每從釋子借自信前生是地仙來
游人世亦偶然洞中丹竈定無恙苔鎖雲封五十年

積善菴舊有海棠一本花時最為爛漫今已不
復存矣

西虹橋西紛薺麥回首名花已陳迹猩血氍毹錦步障
猶有山僧話疇昔似聞王女司此花怕浣塵俗霑泥沙
鶴林杜鵑故有例竟歸閨苑僊人家稍稍枯槎萌短枿

曾無十枝五枝發老夫自愧來校遲不見此花全盛時
作字數紙因戲題其後

激泥硯子南唐款官窑蟾滴儲泉滿小窻
几足盤桓弱挈纔支綠沈管一九襍試方與程偶然落紙為真行
未可汚渠邨姥扇綰蛇紫蚓煩譏評

勺藥歌

豐臺勺藥南地無花徑一尺高大餘都人買此不甚惜
狼藉繇枝橫路隅吳閭勺藥更輸直幾與姚黃魏紫敵

朱欄錦障護春風更將落蕊煎酥喫花之賢賤安足論
且傾綠酒醺花神不煩拈出當階句小謝斯言已覺陳

放歌行

三十六天風颼颼不知何天可寄愁大瀛海環九州九
不知何地堪羶憂憂愁如許苦難理欲借酒鎔攄魁壘
黃金未化丹未成不飲得毋貽後悔海棠木筆次第開
提攜杖屨穿蒿萊馮誰致書葉道士為吾邀取麴生來

醉後放筆作醉鄉歌

昔有醉鄉記我則歌醉鄉願隸醉鄉籍願趣醉鄉衰醉
鄉浩如春日暖風復光人間足憂到此旋已忘忘小者
遠譁爭大亦絕寇攘門無催科吏籬無吠盜尤不知耕
桑艱不識烏兔忙盡室及比鄰熙熙共徜徉孰為園與
臺孰為侯與王孰號兒號妻孰鼓瑟吹簫孰射牛以炙
孰采藿以湘孰壽若錢鏗孰夭若國殤孰者為俎豆孰
者為戈斨死名西山下殉利東陵旁問渠都漠然惟覺
歲月長是鄉僅咫尺舉步入其疆非若求不死雲海迴

茫茫又非參學比芒屨走諸方儻欲往從之但命潔壺
觴醉行歌接羅醉卧倒荷囊麴生不可疏糟邱不可荒
吾老是鄉矣慎勿醒而狂

按無功作記謂去中國幾千里予以為殆非習游
醉鄉者使果如此則終無問津者矣故歌末及之

送李推官赴軍前

旌旗獵獵呼朔風銜枚疾走冰雪中將軍手攜丈二組
一戰竟縛蕭老公龍角謹鳴鼙鼓吼脇從橐甲求自首

馮君草檄諭諸蠻楯鼻千言如宿構

舟往堯峰遇雨

橫塘渡口北風起橫山濛濛水雲裏老夫鼓柁西南游
急雨隨風打船尾春鉏挿喙栖沙汀蜻蛉接翅飛從橫
風頭潑墨雨腳白阿香隱隱將車行柁樓濁浪大如許
停船暫纜前邨樹獨有漁師不畏風張颿曳網湖中去
游姑蘇臺臺之左一僧廬焉

吳王在時高築臺吳娃一笑相隨來粉綿撲面脂拭口

共唱吳歛舞垂手吳王一去臺已傾酒城稀巷空從橫
土華泣露侵官道胡虺紛紛抱華老千年社酒澆鴟夸
鼓聲不到夫差祠君不見臺前盡屬民家地漸有山僧
規作寺

自胡巷入焦龕

西山山色如環連堯峰一角尤攬天山中松石秀而莖
山下李梅幽更妍數家墟落近相接後通曲港前平田
出檐高支賣酒望繞岸競尾罾泥船老夫卜築山之麓

不置廈屋惟卑椽穿渠稍決旁舍溜種竹但引西家鞭
朝來解后風日美山紅澗碧供攀緣歡聲直排烟霧起
快步欲鬪蜎蜎先偶遭鄰父泥小飲亦訪社衲談盲禪
幅巾行滕絕可喜路行不識疑為僊人生忽忽如寄耳
底要不朽垂千年不如乞此把茅地陶邨鄭谷師前賢

戲贈道者

門前竹石承飛流與世略如風馬牛茯苓作湯芝作脯
松醪一醉三千秋飄須純黑顏微紅時時采藥登高峯

今年別我泰山去定緣玉檢將東封

予每蔬食因歷叙山邨所有蔬菜作歌

窮鄉滋味殊不窮邇來自幸山庖豐稜魚散生膚毳裹
擇龍逸出鞭須中楮根逢雷蒸紫葷芎苗過雨留芳叢
芋魁兼斤頗紅潤蘆菔徑尺尤肥鬆白菰如豚瓠類鴨
試評其美將無同爛蒸何妨著鹽酪作糝未要加薑葱
老夫一飽捫此腹欣然移步邨西東鼈裙鵝蹠渠不羨
宥為黃雞白酒煩鄰翁

南山有虎行

今年春虎至堯峯久而未去

有虎有虎南山南
爪牙銛利須鬚髮妖狐
狼鬼受役使
據岳雄視何耽耽
茶生旗槍竹榴筍
邨人采斲相牽引
嘯聲一振爭卻奔
恐委疲軀膏虎吻
安得淬箭施長弓
盡殺子母機檻中
坐令茶笋利三倍
酤酒擊豚娛社公
擬登堯峯會雨不果

淙淙澗中流
淅淅檐下溜
桃花開及旬
水至母乃後
一雨霑菜麥
邨鄰共拊手
老夫數獨蹇
出游每不偶
鷓鴣

來阻行嘯聲似苦口小飲破餘寒兀坐消清晝海棠不
暇惜辛夸尚何有明日雨當止好辦肩輿否

飲酒作

東家掘芋魁西家斲山藥叩門相餽遺俾我助斟酌入

糝膩且甜戒勿下鹽酪牀頭十月白

吳下邳酒名

其味

差不薄濁醪配嘉蔬宵羨屠門嚼惜哉無好事兩手自
醅酢一榼復一榼狂嘯頽然作暫回衰病顏牢捉敲斜
腳積苦心血衰今宵睡應着

邨口看桃花

山中十日九苦雨黃鸝無聲綠鳩語鉤簾忽見亂山晴
整頓芒屨蹋華去楊柳橋西谿水長吹花風起水生香
欲知前面花多少一簇紅雲擁夕陽

醉後自和放歌行韻

雨聲淅淅風颼颼杜門隱几生煩惱兒曹走報杏花發
對花不飲花亦愁古云濁醪有妙理又聞醉鄉風土如
畏壘一尊自壽兼屬君喚作酒狂吾不悔吾不願驅車

直上黃金臺亦不願泛舟入海尋蓬萊但願花前置酒
三百斛徑拉酒徒相往來

穀兒晬日

我生固多難頗受憂患歷飄零竟何之辟若風中葉壯
歲違同衾井臼莫能攝暮年失主器每懼烝嘗闕幸有
兩少男秀眉玉兩頰挽須屢爭嬉覓棗各夸捷庶幾君
子澤奕世猶未竭紫麝塗汝面桃花醲汝靨比來門戶
衰需汝光舊閨虎兒雄顧盼驪子快馳突早希巖廊人

勲業攀鱗甲

張六子不食蟹詩以戲之

楚鳧肥可羹江鱸鮮可斫更取蟹譜觀相勸烹郭索千
邨罷亞如雲屯昨日輸芒朝海神試評尖團誰最美二
者風味皆可人小著薑醢計非左俛視魚蝦殊瑣瑣嗟
君不食意若何食指必搔頭必朶赤玉之盤黃金脂酒
酣奚但將螯持君不見過江傖父非書簾僅得螯蜺貯
空腹

謫僊歌

有僑衛我足安用乘鶴軒有飯果我腹安用烹熊蹯貴
人作計何太淺歲暮日斜悔應晚豐碑突兀祕器華相
逢奚暇歌招輓鈍翁於此殊達觀末年五十投其冠山
鰕水鳥互馴狎谿友園公頻往還但搯枯藤穩晚步或
采嫵蕪充朝餐初不知烹鍊伏火鎔金丹亦不知沐浴
華池吞玉泉春花開時秋月上茶甌棊局常欣然俗腸
輕薄凡眼肉若箇識有斯人賢一朝徑蹋采雲去然後

謹呼是謫僊

客至

讀書舌本乾澆藥體中倦一鑪一棊几聊自弄筆硯門
前無足音寂寞亦所患輕舟柳陰來知不遺老賤出肅
具冠履聚闕走羈紉朝來鵲楂楂客至果適願墟落距
市遠盤餐猝難辦小剪園中蔬為君具麕饌

病起

向道逾數年庶幾嗜欲寡比來少眠食病骨不盈把巫

言星限凶醫謂客邪舍力圭力固緩禱祀策尤下是身
等浮雲離合悉為假不如先自治要使妄心捨形神俱
冥忘哀樂兩鎔冶久之漸有得生意尚苟且縱令凋蒲
柳幸未先狗馬餘齡頗自慶願學支離者

泛谿二首

數里水縈轉景物乃爾清綠蒲間紅蓼點綴谿流明漁
人往市魚柳外一艇橫須臾得酒還隱隱擢歌聲

谿痕不盈尺淥淨差可涉中有花鴨馴飛飛逐輕楫淒

風罨岸來葉落枯葦折彌望蕎麥花沿流獨如雪

朱翁子藏書廟并序

俗傳買臣妻投水死與漢書小異今此地有朱氏自言
為買臣後按買臣子山拊官至右扶風豈即故妻所出
耶抑非也朱氏亦無知之者矣又有讀書臺在穹窿之
麓距廟可二里

讀書幸屬承平時能說春秋言楚辭嚴徐枚馬略相等
何意聯翩白玉墀向來落魄栖巖谷束廩要鎌取書讀

閨中少婦不知我任采薜蘿春草綠丈夫變化搏長風
不用為蛇用則龍金章紫綬成底物徑須圖畫甘泉宮
此君讀書為何事但作區區衣繡計驚走俗吏驕故妻
五十之年直兒戲

田家行

前年雨霖憂漂沒屋塌籬傾貧到骨去年徧地飛螽螟
了卻官租馱糠覈怡喜今年菜麥新絕無疾癘與災連
田家方釀雞豚社又報前邨虎啞人

遣意

上車不落為著作何妨諸史求高閣解義兩行得中郎
安用上第稱賢良從來窮達固有命三至九卿亦云幸
老夫終歲守空山耻向長安求捷徑槲皮作冠布作袍
一聲清嘯殊足豪功名聊付北窓卧意氣直竝南山高
君不見此老月食不盡米四斗區區宦情復何有

南史何胤

傳吾年五十七月食不盡
四斗米何容復有宦情

甫草自言讀書灌園之樂因次韻寄三首

五湖迥浩淼龍物之所家吾子栖湖干風雨老屋斜沈
酣六藝籍寧屑箋魚蝦門外好事誰惟聞雀聲譁

學道三十載時賢莫能名大則著為書次之以詩鳴印
期古作者其風穆如清勿謂知我希庶俟後聖生

桂以芳自伐象以齒焚身何如遜邱園竊比草土臣谿
毛薦高堂樂我天倫真干祿亦奚為卓哉養志人

顧生有典見過山莊

養疴荒江上索處毋乃迂延緣出葦間大半皆谿漁曉

來聞剥啄良友就我廬身非龐德公顧遇諸葛徐驚喜
兩俱有不暇問起居展我所藏畫出我所著書一談兼
一笑頓遣肺病除微嫌市門遠無物充齋廚何以佐小
飲栗實桃梅諸旋煮盎中黍細翦籬間蔬未敢殺能鳴
此戒廿載餘儻能恕我貧襤被暮可舒

再賦種菜贈吳孟舉

方畦數畝如碁局嘉蔬離離繞畦綠葵韭蔥齏蓼蘇薑
以采以湘吾願足山中雨多土易滋今年不憂菜饑時

白魚糖蟹雖佳味耻倩門生共議之

孟舉和予種菜詩見寄因次前韻

御筵供自大官局禁臠紅肥上尊綠書生曾饜天府珍

歸絮吳酸心亦足

上大婚及元日廷臣筵宴臣琬嘗與

其列故云薺甲菰茅雪後滋小摘正直晨吹時須臾下箸已

一飽行飯出門隨所之

東征歌

山城僅斗大數輩皆草竊何須論攻圍拍手即笑殺桓

桓東征師視汝比蠮螋特假漏刻命豈能延日月

聖恩廣大真如天盍來面縛軍營前白頭作賊尚不可
汝曹況值童騃年

衲子歎

羣衲住院紛鬭爭試問道眼誰分明葛藤樁子推未倒
盲喝錯棒頻施行趙州雲門眇何處重銓玄要皆死句
豈如竟作粥飯僧澆囊盜帑隨緣寓我亦不必火其書
亦更不必人其人但將龍蛇凡聖為君分果能踢倒禪

牀拗折杖俊哉此袖真超羣

雨

蒲簾不御絺衣輕快風吹雨來江城高梧簫簫葉欲落
長松謾謾枝相撐濃雲儵忽如山崩飛電復如狂矢行
雨中髣髴有龍見點如車軸聲如傾老龍抱珠卧潭水
是誰作意驅之起偶然鼓鬚掉修尾不覺為霖潤千里

葉子陽生勸予出山以此答之

事不理問伯始濟世安人亦徒爾事不諧詣文開杜門

却軌何為哉北路魚南路徐朱輪錦障塞通衢江千萬
蔡五百銅山金埒無遺策勢燄炙手手可熱往往古今
齊一轍堯峰壑容獨怡然常栖茅屋耕石田新知惟恃
壁閒杖舊物賸有牀頭甌比來鬢禿齒都豁但守壠畝
終餘年君不見大鵬小鷄各有慕世人未必知其故功
名富貴能幾時久矣掉頭不復顧

思嗜軒詩

并序

故貞毅先生於所居藝圃中植棗數株長君勉中遂以

思嗜名其軒諸君子各贈詩畫予亦賦一首

中庭棗實何離離先生去矣不可追平生絕似子曾子
每逢剥棗朶我頤郎君能泣蓼莪句秋霜春露淒然處
目望昭亭墓上雲手扳藝圃池頭樹

宣德窰脂粉箱歌

并序

諸君子為此歌引物連類多至千餘言予不能然也聊
約其詞為十二句

景陵踐阼承平中干戈不用年屢豐饒州花斃充供奉

聲賈略與官哥同
內家妝成希進御
調脂弄粉常侵曙
至今玉骨閼荒斜
猶見深宮舊奩具
百年珍翫散四方
民間骨董誇宣皇
香鑪壇醖皆奇品
不敵君家脂粉箱

藝圃十咏

南邨

望望路轉深延緣
籬落靜熏風亭午
來竹樹散清影微
娟一縷烟有人方
驚茗

紅騫館

高館驅鷺羣一一梳翎翅煥藉莎草眠羣穿茗花戲莫
學曇礪邨持換黃庭字

乳魚亭

碧流艷方塘俛檻得幽趣無風蓮葉搖知有游鱗聚
翡翠忽成雙撇波來復去

香草居

光風被蘭杜幽豔森然發不知欲遺誰美人勤采折芳
歲每易闌恒憂蕭艾奪

浴鷗池

積泉激不流白鳥泛空濶眇眇蘋蓼中數點明如雪更有兩鴛鴦飛來共成列

度香橋

紅欄與白版揜映滄浪上兩岸柳陰多中流荷氣爽邨居水之南屣步每獨往

響月廊

回廊何窈窕所忻夜景清澹澹露華積迢迢漢影橫漸

見高梧末裊回園魄明

垂雲峰

茲峰洵云竒本自太湖選位置小山間亭亭似孤巘何
人舊題名遺墨蝕蒼蘚

六松軒

小築如空山蕭蕭清籟發幽人披素衿長嘯坐林樾夜
久濃翠寒猶然待明月

繡佛閣

朱甍高入雲泠泠度金磬中有散花女焚香禮清淨梵
香繞空虛從茲證聞性



堯峰文鈔卷四十二